

ren auch vnser Fuste wegen eines Nebels auß dem gesicht/ derowegen wir ein Stück 1615.  
abgehen liessen/ kam also dieselb vmb 10. vhr wider zu vns.

Den 16. vnd 17. lagen wir auff Ancker. Den 18. aber verlor vnser Fust ihr Ancker  
vnd Sell.

Weil wir nu den windt ganz zu wider/ darneben vnser Volck gar matt vnd krafft-  
loß/ hatten wir vns entschlossen wider nach Sierra Liona zu lauffen/ vns allda zu  
erfrischen: nachmittag aber wähet der windt auß dem Nordosten/ derowegen wir  
jimmer nach dem Süden zu fuhren.

Den 20. kamen wir auff die höhe von 8. grad vnd 30. minuten.

Von dem 21. an biß zu end dieses Monats/ hatten wir vnterschiedliche wind/ biß-  
weilen kein/ bißweilen grosse regen.

Den 30. kamen wir auff die höhe von 5. graden.

Den 5. Octobr. hatten wir die höhe von 4. graden vnd 27. minuten/ vmb den mit- Octobr.  
tag hörte man vornen am grossen Schiff ein gewaltiges rauschen vnd kirren/ also/  
daß der Schiffherz/ so hinten in der Galderen saß/ meinte es wer jemandt von den  
Schiffnechten vornen von dem Schiff ins Meer gefallen. Als er nu neben dem  
Schiff hinab in das Meer sahe/ ward er gewar/ daß das Wasser nicht anderst sahe  
dann lauter Blut/ konte aber nicht wissen woher solches käme: Hernach aber als wir  
in den Meerhafen Porto desire kommen/ vnd vnser Schiff reinigen vnd bessern  
wolten/ haben wir vornen am Schiff/ etwan 7. Fuß vnterm Wasser ein Horn gleich  
dem spitzen eines Elephantenzans/ vngesehr eines Fuß lang gefunden/ welches durch  
3. starck vnd dicke Bretter gangen: darauß abzunemen/ daß ein grausames Meer-  
wunder an vnserm Schiff/ vnd wir also in nicht geringer gefahr das Schiff vnd Le-  
ben zu verlieren gewesen.

Den 10. fiengen wir viel Fisch/ waren auff der höhe 3. graden vnd 30. minuten.

Den 15. kamen wir auff 2. grad 35. minuten/ des andern tags auff 1. grad vnd 45.  
minuten/ das Meer war ganz still/ vnd sahen wir viel Wallfisch.

Zwischen dem 19. vnd 20. fuhren wir durch die lini. Der windt auß dem Süd-  
osten vnd Sud Südosten/ wehrete biß auff den 24. dieses Monats/ verloren wir do-  
zumal ein von vnsern Seaeln. Vmb den mittag waren wir auff 3. graden 43. min.  
jenseit der æquinoctial Linien.

Den 25. Schifften wir mit selbigem wind immer fort/ vnd hatte biß auff selbigen  
tag niemant von vns gewußt wohin vnser Ränse möcht angesehen sein/ dann allein  
der Schiffherz Wilhelm Cornelissen Schout/ vñ der Commissari Jacob le Maire.  
Dozumal aber ward vns angezeigt/ daß das fürhaben were ein andern durchgang  
außerhalb der Magellanischen Enge in das Suder Meer zu suchen/ darneben newe  
vnd zuvor unbekante Landt vnd Inseln zu entdecken/ in welchen nach menniglichs  
meynung/ grosse Reichthumben vnd köstliche sachen sein müsten: da aber solches et-  
wan fehlete/ durch das Sudermeer in Ost Indien zu gelangen. Mit dieser anzeig  
war menniglich zu frieden/ als die nu wußten wohin sie geführt würden/ vnd verhofft  
ein jeglicher wolte noch ganz güldene Berg darvon bringen.

Den

Den